

# Premi svizzer da litteratura 2016

Gronda onur e renconuschientscha meritada per Leta Semadeni

■ (anr/gb) L'Uffizi federal da cultura ha envidà gievgia saira a la surdada dal Premi svizzer da litteratura 2016. En preschientscha da cusseglier federal Alain Berset èn set auturas ed auturs vegnids undrads per lur ovras litteraras. Tranter quels era la scriptura ladina Leta Semadeni. Tamangur. Uschia sa numna il cudesch premià da *Leta Semadeni*. Ses empir roman na fa dentant betg allusiuin al gaud da schembers en la Val S-charl. «Tamangur» raquinta en 73 scenas da la convivenza tranter in uffant e sia tatta en in vitg muntagnard grischun. Il tat ha bandunà la tatta e l'uffant e sa chatta uss en il paradis dals chatschadurs a Tamangur, in lieu zunt misterius en ils eglis da l'uffant. Fertant che l'uffant observa tut or dad ina perspectiva naiva ed innocenta demussa la tatta ina vista subtila e murdenta. Il cudesch viva dal midament tranter realissem e fantasia sco era da tristezza e legria. Il giu tranter las duas figuras protagonistas è fitg reussi, pretendà dentant era bler sensori dal lectur. Intgins schabetgs impurtants per il raquint na vegnan mai menziunads explicit, uschia ch'il lectur astga far ses agens patratgs.

La giuria dal Premi svizzer da litteratura ha sa laschè persvader da la qualidà da «Tamangur». Dasper l'ovra da Semadeni han ils nov commembers da la giuria premià sis ulteriurs auturs cun lur cudeschs: *Giovanni Fontana* cun «Breve pazienza di ritrovarti», *Massimo Gezzi* cun «Il numero dei vivi», *Yves Laplace* cun «Plaine des héros», *Antoinette Rychner* cun «Le prix», *Ruth Schweikert* cun «Wie wir älter werden» e *Monique Schwitter* cun «Eins im Andern». Mintga premi è dotà cun 25 000 francs. Plinavant è *Alberto Nessi* vegnì undrà cun il Grond premi svizzer da litteratura 2016 per sia ovra da vita. *Hartmut Fähndrich* ha retschet in premi per sias translaziuns ord la litteratura araba.

Ils cudeschs victurs pon ins retrer en mintga libreria. Per dapli infurmaziuns e las ulteriuras indicaziuns bibliograficas cliccai sin: [www.premislitteratura.ch](http://www.premislitteratura.ch)  
Leta Semadeni, Tamangur. Rotpunktverlag, Zürich 2015. ISBN 978-3-85869-641-0



La lirichera Leta Semadeni ha già adina vulì scriver prosa. Cun «Tamangur» è quai reussi oraifer ad ella.